

湖南褒忠录初稿

湖
南
寶
壽

錄
心
案

同治十二年
用活字印行

湖南褒忠錄初槁序

國家禦侮之事專藉人材而人材之所由奮興則山川之鍾毓啓之亦官師之教養有以馴致之湖南置省百餘年矣俗尚儉樸民習勤勞魁偉奇特代有聞人咸豐初年粵匪攻犯湘

城駱文忠公暨張石卿中丞悉力守
禦賴以安全復推誠延訪薦舉得人
一時崛起從戎櫛風沐雨不避艱難
猛將精卒率皆楚產其忠義之士衝
鋒陷陳致身行間者尤未易更僕數
文忠又懼歿王事者之湮沒無以慰

忠藎也聘郭筠仙中丞羅研生中翰
周漱安明經采撫事實接續成篇比
軍事漸定書亦告成復經吳南屏學
博審定凡若干卷待付剞劂洎歲壬
申余來撫楚乃仿用聚珍板印行之
期使忠肝義膽不與歲月俱逝後之

志士亦將聞風興起焉洪逆猖獗十
有五年自下長江後勢如破竹蹂躪
十餘省淪陷數百城荼毒生靈幾徧
海內

天威所振將士用命卒能敵愾奏功
楚軍為最此非湖南獨裕於材與

朝廷之用人偏有所厚也九疑衡嶽
翠律蜿蜒合南條沅澧諸水奔駛而
下會於洞庭以達江海渟涵韞藏地
靈人傑蓋有由焉都人士歸美於前
撫趙恭毅陳文恭諸公為能振興風
俗教育羣材有以作貞固敦龐之氣

也余撫是邦愧無樹建惟覽湘嶽之
雄秀徵荆楚之文獻竊願此邦人士
文經武緯紹述前修蓄德養器以備
盛時楨榦之材杞梓梗楠當自甲於
天下也奚止慰忠蓋乎哉爰述顛末
敬作弁言

同治十二年歲次癸酉季夏月吉日
撫湘使者王文韶敬序

湖南褒忠錄初藁序

咸豐十一年言官上議以軍興以來
死節赴義之士所在有之宜搜采纂
輯為書俾不終歸湮沒於是
詔下各直省悉如所議湖南自故太
傅曾文正公起家練兵討賊將帥之

士龍搏水擊縱橫四出功最多其以
死勤事者亦最盛是時濟南毛公方
攝南撫咨商駱文忠公於西蜀乃開
設褒忠之局於省會屬湘陰郭筠仙
中丞董其事未幾筠仙中丞出涖蘇
松督糧任又以屬湘潭羅研生中翰

偕長沙周漱安明經采輯編纂凡六
年成書積藁四十餘帙時金陵甫克
曾文正公北勦捻逆於山東軍事尚
未竣訖未以付梓歲壬申今中丞仁
和王公撫楚諭是書之成已閱數年
恐日久或致殘缺數年采訪之勤與

其編輯之勞將廢於一日蔭森適提
調書局因請先印行之又經巴陵吳
南屏學博重加芟節仍以成書之日
為斷留所餘以俟續修夫山川之蘊
蓄人才之鬱積古今未少易也而有
振而新之表而倡之遂以勃興不可

遇抑讀是書而慨然於曾文正公之
德業所以提唱其鄉里者為功甚偉
而花縣駱文忠公銅山張公先後撫
楚扶掖而作興之其用心為尤可思
也

同治十二年六月吉日阜甯裴蔭森